

第二庚子自述駢言

第二庚子自述駢言有序

東莞劉乃勛少弼

此篇係由八六自述駢言。大加增改。是以較爲明白詳確。勛生逢兩庚子。前庚子。八國聯軍入京。勛年二十有九。初到桂林時也。

生科舉時代。不能由科舉出身。作文章工夫。那得有文章名世。則以小時了了。惟日孳孳。陸士龍敢詡才多。陳太邱實緣愛博。方事螢囊蠹簡。八股專研。其如篆刻蟲雕。一心紛擾。東塗而西抹。右有而左宜。詩社鐘敲。開府參軍之詠。燈壇錦奪。外孫幼婦之辭。新年嘉節以成聯。肯讓湘鄉獨步。殘月曉風而製曲。又羨迦陵倚聲。以終賈之年華。藉膺滂而標榜。邑侯考校。恒列前茅。郡守甄衡。亦躋上乘。迨乎輶軒使至。玉尺才量。以清真雅正爲方針。以詩古文詞爲雜覽。祁軍六出。范筆一句。世莫知曲逆之奇。空紆籌策。身倍遭展禽之黜。無可怨尤。蠖之屈其奚伸。鷦之飛其終退。①此一時也。窮途改轍。習平亭鼠牙雀角之爰書。記室濫竽。治役使雁足魚鱗之筆札。旣而舍茲琳瑯。業此申韓。②殷羨書投。郗超幕入。巖疆兵燹。襄召杜之循猷。列郡謳歌。佐龔黃之德化。勞勞五就。忽忽三年。③廣西巡撫張鳴岐中丞。以言偃武城之治理。遽誇子羽之賢。以孟博汝南之政聲。遂信宗資之績。弓來招我。幣聘從伊。國計民生。主持章奏。罪言詩史。嘯傲公卿。牛李排擠。無黨援之朋比。荀斯授受。無謬種之流傳。卻諸公袞袞之多儀。預杜賄交於三節。勵一介涇涇之素行。非同神話之四知。④時當獅睡漸醒。鴻圖式廓。例如學堂經始。監獄改良。自強訓練乎新軍。獨立維持乎司法。考績不

居王後。報政豈讓齊先。越年廷旨。改幕爲僚。分科治事。士欣釋褐。人幸拖紳。張中丞爲助。捐納熊軒。奏留象筭。起家白屋。筮仕黃堂。逼人之富貴方來。知己之馳驅應許。惟助宦情水淡。歸志浩然。客戒乎裝。主授其轄。居停如故。榻特留賓。傳食依然。餐旋授子。⑤直至中華肇造。民國共和。惟茲蓬華之陋儒。仍作芙蓉之上客。子子之干旌杳至。翹翹之車乘爭來。唐肅愛鄴侯。衣著山人之白。燕昭崇郭隗。臺營賢士之金。好篤緇衣。禮隆纁帛。將軍長往。揖客猶存。⑥此又一時也。彼夫東魯言旋。宣尼講學。西河退老。卜夏傳經。與其長此運籌。預人帷幄。何若從茲息轍。適我琴書。因而安定齋分。季長帳設。莘莘濟濟。削竹披蒲。宛宛嬰嬰。頌椒吟絮。學有朋其足樂。教多術其奚施。徵諸良醫之起沈疴。必先備藥籠之物。名將之摧勁敵。必預儲武庫之材。故數典雖遠而勿忘。隸事以多而益善。爰乃門分類別。選摘詞腴。綱舉目張。編爲字課。五經羣史。循流以溯其源。三都二京。去膚以存其液。枯腸以潤。枵腹以充。曹子建羨其斗量。邊孝先誇其笥貯。頑嗣豈虞儀之比。弱息非班左之倫。然而能讀奢書。非同趙括。可傳融業。以授康成。詎容期以異聞。無甯謂之高足。講習占乎麗澤。攻錯詠乎他山。泌架曹倉。橫舍之空疏可補。湯盤禹鼎。士林之美富彌增。郝隆放言。腹披自曬。呂蒙暫別。目刮相看。循誘先以博文。爲命終於潤色。卜居枌里。有更番推宅之主人。私淑蓼樓。爲未得及門之亡媳。⑦此又一時也。勛慚加馬齒。八秩俄經。未學犧爻。數年幸假。姜牙璜釣。師尙父鷹。翮維揚。梁顥科登。老狀元龍頭獨占。進而衛武悔

賓筵之過。伏勝傳媛闔之書。類皆耄弗倦勤。老常益壯。惟勛頽齡垂盡。痼疾相尋。聾耳無聞。徒振適人之鐸。小腸下墜。常眠逸少之牀。暮態龍鍾。知交零落。梁園賓主。宿草霜凋。芸館生徒。斷蓬星散。燈社縱懸謎彩。誰爲射虎之雄。觴筵若角詩鐘。那有探驪之彥。香江生曠。負亡姬同穴之盟。⑤穗石敝廬。增殘客故園之慨。⑥猶幸鄭頻推轂。貢不彈冠。否則下士曳章縫。遽載鶴琴而出守。書生論筆墨。輒開虎帳以談兵。將見淮陽臥治。甘棠翦伐。棘門兒戲。大樹飄零。沈酒醉翁。忽動秋聲客感。牢騷內翰。愁吟春夢婆言。悵宦海之多淪。倅旋渦之未入。今日者。紀鴻泥而歷歷。驚駒隙之駸駸。轅固齒衰。江淹才盡。⑩老而不死。比年迭輓詩聯。病莫能興。前歲三辭文史。⑪所幸桑田籌下。蔗况甘嘗。往事依稀。予懷悵觸。扶杖而觀德政。幸際昌隆。捫珠而記生平。自憐蕭瑟。

(附註)

註① 勛應東莞縣試。應廣州府試。多在前列。惟應廣東學院試。六度被黜。第六度試學院取列第三名招覆。以身帶買卷餘資。洋銀五元犯疑。亦被黜落。嘗有句云。逐客又爲門外漢。誤人都是墨西哥。

註② 勛先在張建鏞先生廣東博羅縣幕。讀律四閱月。旋就廣西補用知縣馮鏡芳大令。書啓幕客者六年。馮大令辦鬱林釐務。兼代理鬱林州。及辦濠江釐務。並署陸川縣。均約與偕。後在湯恒濤先生廣西按察使幕。讀律六閱月。

註③ 勛就廣西馬平縣向塗大令。廣西永甯州呂鑑熙刺史。廣西桂林。梧州。平樂府歐陽中鵠太守。刑名錢穀幕客。合計三年有奇。

註④ 前清習慣。督撫總文案幕客。春夏秋三節。本省提鎮副參游都守。司道府廳州縣。及各釐廠。各有餽遺。名曰節敬。每節可收銀二千餘兩。勛入廣西撫幕。兩廣督幕。悉謝絕之。或曰此係習慣節敬。當衆致送者。並非私餽。似受之無礙。勛則視爲不枉法賍。且係賄賂公行。如何可受。

註⑤ 廣西巡撫張鳴岐中丞。出貲爲勛報捐知府。奏留廣西補用。是爲特旨班知府。勛力卻之。比及中華民國二年。廣東都督龍濟光軍門。由梧州揮軍定粵。首以二等文虎章。陸軍中將保薦。勛又力卻之。孟子所謂庶人在官。是不入宦海之旋渦者。

註⑥ 勛就前清廣西巡撫。兩廣總督張公鳴岐。總文案幕客。入中華民國後。已無幕客之地位之名稱。勛仍就廣東護軍副使。廣東都督。兼民政長龍公濟光。廣東巡按使張公鳴岐。廣東省長朱公慶瀾。李公耀漢。翟公汪。廣州市長金公章。總文案幕客。後無繼者。

註⑦ 勛在香港設立男女私塾二間。每塾學生九人。每人歲脩西紙三百元。編有丙寅。庚午字課。督同子其勉。銳之。其慎。其晦。子婦陳麗玉。女志澄。分齋教習。李瑞琴君。有子四人女三人。子婦一人。孫二人。女孫六人來學。兩番推宅住眷。並延在其家設帳。梁日東廳長。第十四女覺蘭。有兩兄來學。將一廬存稿教之。稿內駢

文。琅琅成誦者多篇。殤年二十有一。梁廳長以之許字亡兒其諒。締結冥婚。

註⑧ 助營生壙於香港華人永遠墳場。中華民國壬申年二月葬黃姬端端於壙右。用示同穴。景迫桑榆。廣州流寓。到港未必有期也。

註⑨ 助在廣東省城大北門內周家巷。買地三畝餘。建築一廬。山塘亭榭。具體而微。建築費二萬零五百元。後以時局不甯。將一廬賣去。避地香港九龍城。

註⑩ 中華民國十三年。助在商務印書館。刊行一廬存稿四卷。上二卷。詩古文詞隸焉。下二卷。官文書隸焉。一九五三年。刊行一廬八十自傳一卷。一九五四年。刊行一廬詩選一卷。一廬時事詩存一卷。一九五八年。印行一廬文詩聯選存一卷。一廬毫詩零存一卷。現存一廬續稿八卷。百日淹通集八卷。一廬筆記一卷未梓。

註⑪ 一九五六年七月。廣東人民政府。派羅翼羣同志。九月派胡漢賢同志。十一月。派潘煒炎同志來宅。徵助同意。委作文史研究館員。無庸到館。無庸辦事。助以衰病之身。不敢領無勞之薪水。三度辭謝。十二月。上書廣州市委會統戰部羅培元部長。書長一千餘言。瀝陳下情。籲請收回成命。書中有句云。硜硜怪性。領薪懼貽素食之羞。碌碌庸才。任職又乏酬知之具。自以爲四語。能括一書大旨也。

版藏 香港 金剛印字館